

繪

圖







界山鉛溪口至北

西至石塘仰安界





石人山

石人山

石人殿



石人殿

石人殿

玉山李 壁繪

新建余鈞衡刻

仁縣志 官階姓氏

總裁

御前行走太子少保兵部尚書兩江總督部堂兼管河務世襲騎都尉薩 載

兵部侍郎兼都察院右副都御史巡撫江西等處地方兼理軍務提督糧餉都尉 碩

鑒定

江西等處承宣布政使司布政使軍功加一級又紀錄六次馮應 樞

同鑒

江西等處提刑按察使司按察使總理驛務加二級紀錄四次吳之 繼

江西督理通省糧儲道兼巡南撫建地方兼管水利加三級又卓異加二級舒 肅

官階姓氏

江西鹽法道分巡瑞真臨地方兼管驛務水利加五級紀錄次杜憲
江西分巡廣饒九商興傳道兼驛務仍督九江關稅務兼理鹽課加五級紀錄次劉鑿

總修

廣 信 府 知 府 連 柱

與修

上 饒 縣 知 縣 程 榮 豐

原序

知古之所謂良知今之所謂陋矣新唐書自稱文簡
事備乃歐公同在史局未慊於志遂成五代史自後
人論謂尚有遺漏更如唐宋元明當是時國運此開
人材日聚若顏師古孔穎達魏徵劉煦宋祁虞集宋
濂劉基諸公要不可謂非一代著作才也且各因其
長而用之而今之視昔何如耶况一郡一邑而更數
困於寇盜哉以江西言之惟信疲甚以信言之上饒
尤甚悲夫其間豈無相幾之哲博雅之儒忠義節烈

原序

之行罔不聲沉響絕化爲黃土青燐卽藏之石壁投
之井底寧不思傳述於後乃誰爲護持誰爲拾掇而
垂之乘以入於史耶是則茲邑之陋也蓋六十餘年
矣上饒汪君蒞任三載患其井此而失傳也起而修
之借教諭明君釐定之更合本方諸彥叅稽之皆苦
於又獻無微得一遺十亦足慨矣而其志其事深足
嘉者且較之前志則加密矣夫古人當其事甚難後
之譏古較易尙義理者輕毛鄭拾蕪穢者議洛闢豈
徒十七史歟爰書成而弁其端乾隆九年知府陳世

增撰

政有緩而實急者典策之垂有補風化以義斷之不
得置爲後圖也周官職方氏掌天下圖籍爲志書所
自始下至兩漢地理諸書酈元之註水經元和郡縣
記宋淳祐臨安志詳已國之圖籍史爲大邑之圖籍
志爲要史以輔經昭是非於薄海志以翼史考政典
於方隅故志與史等重也而上饒志之宜修又急於
他縣邑肇於唐歷宋元明皆未有輯康熙二十三年
柯逆之變甫定民困於流離官勞於禦侮奉

朝廷命集爲是書粗舉梗槩考核有所未盡茲又六十餘年矣及今不修因仍如故恐不獨駢駁荒畧已也余方以是爲憂而廣文明君東陽議與余合遂同治其事集諸紳士搜閱百家叅稽訂正刪蕪補漏甲子以前遺者增之甲子以後漏者續之一載始畢上之郡守陳公再加裁定乃付諸梓夫一邑志耳創修興廢可以知時勢焉前者民多凋敝之形今則皆生全矣前者里姦寇盜之警今則皆絃誦矣蒞斯土者豈無劉昆魯恭之賢而有所不服及蓋各乘乎時也余不敏承乏其後仰思

國家文治播洽纂修經史及一統志以史輔經以志翼史非其時歟矧今之志千載事蹟悉具臨民者旣有所援據得以隨地因俗以成化理而此都人士觀其鄉之先哲稽其治之循良則伐柯之則不遠况山川土田風俗人物皆於是乎在又可攷盛衰得失之原而謂可緩乎哉乾隆九年知縣汪文麟撰

天下之事緣忘而後傳也析大而小則自上及下而邑處其後積小成大則自下至上而邑居其先由縣

而郡而省合之成一統志其詳畧浮實斷自縣乘而
起此其端關於政治豈特爲偏隅設哉二書之成其
中有訂有補有增不該罔以獲全不核罔以傳信故
修志爲難上饒至宋熙寧間疆理始定前此或隸鄱
陽或屬弋陽又與廣豐時有分合而歷代無志康熙
甲子詔天下郡縣修志上饒又倉卒而成於兵火之
餘夫五湖九江各自爲說星纏分野互有畧罔自昔
然矣則其誤難訂也且自古未有建邑千年而始立
志者有之自上饒始則上饒志尤難也故秩官

唐皆無之鄉賢唐二人而已自宋以後或有見於別
書而邑志失載者或謬載於隣邑未考正收入者則
缺難補也甲子及今鼎鼎六十年其間有建置有改
移有增廣旣不得畧而名宦流寓人物之續入輕棄
無以服輿情濫收無以協公論則新難增也然任天
下事明與公而已鑒不足不能斷以定其是非腹不
富不能潔以別其雅俗識學具矣又或參以一己之
私如古所譏僞與穢者將沙礫與珠玉同登寧有善
乎余與邑侯汪公暨諸紳士博採羣書以訂其誤補

其缺而增新者亦棄不敢輕收不敢濫旣成上之郡
伯 陳公一再裁定焉未敢云精核也庶幾一邑之
源流本末燦然可見使後人讀其書而論其世得有
所考據而因以興起其自好之心則於政治不無少
補若夫年遠無稽其偉人碩士竟沒於白楊黃葦不
得與諸君子同類而並傳此雖積漸使然亦載筆者
之浩嘆也乾隆九年教諭明東陽撰

或問郡志卽括各邑之志而成者也烏乎異然則有
郡志卽可廢邑志乎曰不可郡志撮其要而邑志

其詳也第附郭之邑城池與共山川無增分野兵
神壇寺觀無改之數者雖欲與郡異而不能也然雖
有不與郡異而不得不與各邑異者田土之肥磽貢
賦之多寡政事之興廢風俗之淳澆也邑志而可少
乎哉去年秋予奉

功令業已纂成郡志及繪輿圖進矣然猶懼舉大而遺
細也欲得各邑之全志一爲披閱以施補救之方今
上饒尹馬君新志告成請序於予令之蒞上邑也始
於康熙丁巳之春適值柯逆叛亂之後爲之招集流

亡軫念疾苦且屢請蠲賑極意撫摩七年愛息休養不亦多乎今年力衰弱清苦自甘卽衙舍傾圮不暇恤尙汲汲以修志爲急務其留心地方上報

朝廷爲何如也舊志載七邑習俗相近惟上饒獨以質朴勝若士民好義急公不累有司今古所聞一也上饒爲七邑之首風化所倡予期士勤學業農勤耕桑將見時雍之化不僅在陶唐時矣康熙甲子知府孫世昌撰

維國家肇造四方底定疆域中外之民莫不梯航

譯朝貢京師輿圖之廣開闢未有於是

詔天下修明郡縣圖籍以成一統之治檄下廣信 太

府孫公纂輯郡志旣成乃命曰爾職縣事饒爲首邑

志容可緩夫志以紀一邑之始終天時人事物產風

俗科名仕宦千百年間瞭若指掌以備法戒至重也

饒僻在一隅地界閩浙從前尙爲荒徼南渡以後密

邇畿輔名賢巨公僑寓其中生其地者咸知以功業

文章自奮遂爲東南一都會焉其後凌遲衰微至甲

寅之變罹禍最慘民人流離入九田業鞠爲茂草環

視域中山川如故城郭如故設官分職如故試問生
耗幾何盈絀幾何人才興替幾何政治得失幾何蓋
不勝俯仰今昔盛衰之感也上饒在信爲附郭幅員
僅百餘里地瘠土疎小民力穡僅供衣食無懋遷化
居之利無山澤封植之饒一遇兵凶蕭然萎矣雖然
天下有不齊之地而有至一之道蘇子曰惟聖人爲
能因風會之所趨而善用其權權之所在而道寓焉
措置各當補偏救弊是在司牧者之汲汲也饒地
敞禮樂政刑備焉此志之作烏容忽諸予與

士博採軼事摭述舊聞前壬子時悉屬草創義例未
安於是振綱挈維芟繁補缺遂爲成書凡兩閱月而
告竣上之 太府復加斟酌以付梓焉將見付之
國史以備採擇皆自今日之修志始則 太府之大有
造於斯邑也予以荒陋附名於末與有榮施矣是爲
序康熙甲子知縣馬之驥撰

上饒縣志

目錄

卷首 序 原序 凡例 目錄 姓氏 繪圖



卷一

天文

星野 占驗 祥異

卷二

地理

沿革 形勝 疆域 都鄙 山水 物產
風俗

卷三

建置

城池 公署 行署 考棚 倉庫 收郵
驛舖 陂塘 津梁 壇廟 坊表 姑嶺

目錄

卷四

賦役

戶口

田賦

軍屯漕運附

卷五

學校

學官

學額

學田

書院

社學

卷六

武備

管制

汛守

阨塞

兵事

演武附

卷七

秩官

卷八

名宦

卷九

選舉

辟薦

進士

舉人

賓貢

仕籍

武階

卷十

人物

先正

學業

宦蹟

孝友

忠節

隱逸

卷十一

列女

賢惠

節孝

貞烈

卷十二

方外

仙釋

寺觀

卷十三

雜記

一 饒縣志 卷首

一 通志首載

制詞所謂皇極之敷言是後是訓於帝其訓者也然必其事其文與境內相比附方合體裁

國家

聖聖相承

詔令所頒光天之下至於海隅蒼生無不歡呼感泣不藉志乘而始著上饒前志詳悉登載如通志例且列前

凡例

代於前而以

本朝次之非所以尊

王制也今於郵政一條

皇恩備載俾守土吏遵守無斁焉

一志乘有綱有目書所謂若綱在綱有條而不紊必有目而無綱則散且不與綱相綴屬則紊今惟綱目以目附綱截然不可移易其位置次第俱有存焉

一後漢郡國司馬彪撰本志惟郡縣大書其名其山川

地名悉爲細注貴溪前志於山川及建置內津梁陂塘因之今更仿其例於他目中亦以便查閱也

一郡志立沿革表分合省併依時代考之瞭如指掌故地理書內不復編次亦史家例也前邑志沿革亦多有用表者然未立縣以前其所載祇統轄地名殊令閱者目眩今故惟於地理內著之不復立表

一選舉表諸志多以譜牒爲據有非本籍而引遠祖名見表中者今就所知者乙之至實係土著而登科錄係他郡邑籍貫者亦應加按以識之前志殊混今故

稍爲核正

一選舉旣首列薦辟則仕籍所錄不外掾例二途然必各登仕版方許入表前志有止列銜名者甚且有姓名而未著品秩者槩不登入表中

一史家採輯舊文或兩收之致前後岐誤雖馬遷已不免況他史乎舊唐書一人而立兩傳則尤疏矣前志復出者七邑皆有之雖反覆核校然事遠無徵尙未敢自信云

一志事增於前文省於舊作者所自負也志乘而

漫無決擇將屢增之一邑之志無慮汗牛充棟以修爲然簡而不能明非註不可則又宋子京列傳所爲遠遜於歐陽志紀者矣今故一以通達爲主

一前志人物列傳有從通志例不分品目者淺材薄技而與名臣名儒並列無乃不倫又有區分品目而層見錯出愈煩愈亂者惟貴溪前志頗爲得體然列者壽一門亦惟年踰百齡者得附諸義行之次其人亦僅見矣

一志乘無生人立傳者此通例也沒世不稱君子引以

一修縣志 卷首
爲恥誠以人生斯世勢利之見愛憎之口有全不可恃者至沒世而公論稍稍出矣諸前志有未蓋棺而論定者至於今諸多物故核其實有可紀者仍之否則亦不沒其名焉

一 通鑑不錄文人以其爲資治之書故也若鄭氏通志馬氏通考則皆列書目義關述作燦如日星矣前志多據家譜及子孫呈狀載某人著某集亦無卷帙今查訪幸無其書前輩書目雖大半遺佚然自通考而下見名人載紀者自當有據自中丞通志規條必本

家將全書呈送到局方行登載故今槩不敢冒濫焉郡邑志一時並修故凡例已見郡志中并以冠邑志其未備者更列條目如左要之隨事互見載按語中者較詳史記凡例每於本文中見之所謂獨得體要也

上饒縣志序

禹貢職方氏紀九州周禮大司徒掌天下輿圖外史
掌邦國四方之志此天下之大較也今郡邑之有志
固以撫斯土者未能深悉乎風俗人情之至計與夫
因革損益之所宜則無以大經畫而明政體此志之
所關綦重而脩葺之舉未敢後也上饒爲信郡首邑
地據上游其置縣則自宋熙寧間疆理始定由宋而
元而明要皆無志可考迄

國朝康熙甲子新葺一編凡前此循良之吏博雅之英

與夫忠孝節義事蹟亦不過因陋就簡掇拾成編而已閱六十年至乾隆甲子知縣汪文麟復廣爲蒐羅重加修訂較前志畧備歷今又四十年矣茲奉

大憲檄下郡縣飭輯志乘以備採擇余於郡志告成之後次第釐正邑志刪其繁蕪補其缺畧卽上邑一志而六邑視此矣昔朱子知南康甫下車卽以志爲首務蓋欲周知所隸之版圖疆域而後弛張得宜也余自蒞任以來日與二三賢尹講求古循良之績取暇採觚以爲前導亦欲竊倣前賢之意以無負守土

之責云爾雖然未易言也附郭首邑凡城池古蹟及一切建置沿革與郡志無殊考核固易周而事亦易舉也自唐宋以來邑之人文蔚起迄今人知慕義士務急公雖其風氣之厚皆由我

朝深仁厚澤淪肌浹髓而斯民之興起於善者固有不
知其然而然者矣臨民者覘風俗以成教化勤牧養
以寓撫綏庶甘棠膏雨之思有以固結於民之心而
不可解非良有司之責而誰責歟

乾隆四十九年閏三月既望

中憲大夫知廣信府事喜塔臘氏連柱撰



序


歲辛丑夏余自修江調任信之饒邑前太守方開局郡城纂輯郡邑志余因廣稽博考以備採擇會屬草稿未定而局停賴今太守連考核釐訂先郡志後邑志次第竣事於是一郡七邑之書燦然稱明備焉憶余自履任以來日以鈎稽簿書爲事況地當孔道舟車絡繹四方賓客不絕勞勞於應接之不暇更何暇搜一邑之掌故雍容於筆墨之間哉然余嘗謂一行作吏苟存心愛物於物必有所濟志例不關民

事者不書然則所重在事非以文也余承乏茲土已三年矣每往來四鄉見夫名山勝水不敢視爲登眺之資以爲此吾民所藉爲灌輸者也則必思所以蓄洩之過名賢宅里慨然想見古忠孝事蹟以爲此吾民之表也則思所以風示之若夫土田財賦所以爲養也學校所以爲教也武備所以爲衛也何一非事何事不當盡心哉予於三年之內見見聞聞凡一邑之風土人情胸中已有全志今披覽是編而目中更具有全饒矣夫以身之所經証諸志之所紀歷歷可

考而知況是編義例既嚴採取亦富愜公論而協輿情雖邑之士大夫趨事赴公之勤實由我太守勤於政而銳於事舉四十年來未舉之政要提綱挈領縷指條分俾後來者有所徵考則今日一邑之志卽以爲異日致治之書可也余因樂觀其成用附一言於後

乾隆四十九年閏三月望後

文林郎知上饒縣事吳興程肇豐撰



饒縣志 卷一

天文 星野 占驗 祥異



天之高也星辰之遠也以十二次配十二野而謂必
尺寸無差焉難矣五石六鷁不可謂非異也而內史
叔與以為此陰陽之事非吉凶所生何與孔子不語
怪春秋謹著灾異而徵應不具詳焉唯事關民命固
當林然為戒爾

星野

天文分野斗牛吳牽牛主越

周禮注

天文 星野

吳地斗分野今之會稽九江丹陽豫章廬江廣陵六安臨

淮郡盡吳分也漢書地理志

自南斗十二度至須女七度為星紀於辰在丑吳越分野

屬揚州費直說周易起斗十度自張十七度至軫十一度為鶉尾於

辰在巳楚之分野屬荊州費直起張十三度魏太史令陳卓及范

蠡鬼谷張良諸葛亮譙周京房張衡並云晉書天文志

斗牽牛須女吳越揚州九江入斗一度廬江入斗六度豫

章入斗十度會稽入牛一度吳分會稽立東陽郡其太末信安二縣地今屬廣信府

北斗七星四日權為時王水其分為吳宋史天文志

八月斗建酉日在角秋分一日不宜晴中秋月光明無雲重則知次年元宵多雨

九月斗建戌日在房自一日至九日凡北風則設價賤以日占月可知

十月斗建亥日在尾荆楚歲時記天時和暖似春人謂之小陽春一日宜晴此月宜多雨又云液雨百虫飲之藏

蟄

十一月斗建子日在斗冬至日青雲見於北方吉應來歲豐稔否則主旱災

十二月斗建丑日在女大小寒多風雪損畜

四季甲子春甲子雨赤旱千里夏甲子雨播船入市秋甲子雨禾生菰耳冬甲子雨雪飛千里此唐偃

語驗諸時令不忒

四季甲申大雨穀價大貴小雨穀價小貴

天文 占驗

案漢書謂陰陽之精其本在地而上發於天郡縣志於分野之星宿詳列占驗雖亦以示人修省然後言休咎類於讖緯之誣茲不具錄至田間歲時占驗事關民食至政所先古二至之書氛祲三時之紀風雨同此義也詳著於篇

按饒邑山多怪石奇峰層疊當陰雨晦冥之候雲覆山巔帆少開霽而嵐氣布滿城郭郵落矣天下之水皆自西而東惟信水自東而西春夏多南風秋冬多北風所在類然而信則多東西風水之異

之其地勢爲之乎自春而夏晴日少而雨日多每至經旬累月連綿不止故潮沴之氣較他處特甚自夏而秋則炎酷少雨民之苦旱歲以爲常或偶有過雲倏來倏止雨後復晴反致生蟲秋後多霧曉起不辨街衢冬寒不減中州惟以雪爲瑞雪盛之年此來歲豐稔而冰雪之在山谷者日霽不消大抵山多水寒使然此氣候稍殊有不吝不誌者

舊志原跋

按舊志此條於邑氣候殊切其他雜引春秋繁露尚書璇璣京房易候諸書未免泛而無當矣

欽定

授時通考具有成書郡邑志所未詳者自可博稽而通其意非累幅所能盡也

祥異

唐

元和七年夏五月饒撫虔吉信五州暴水

豫章書

宋

景德四年信州饑

大中祥符元年冬十二月甘露降上饒縣

天禧四年冬十一月上饒縣民王壽園中生芝草二本

二連理

以上俱豫章書

皇祐二年夏六月水破城壞官舍湮民居

舊

建中靖國元年信州旱

紹興二十五年以南安雙蓮花贛州瑞木信州芝草並繪

於旗

隆興四年秋七月饒信水

隆興四年饒信二州建寧府饑民曠聚遣官措置賑濟

宋史

六年夏五月大水

九年夏五月隆興吉饒信水圯民居壞田疇

淳熙十年秋八月信吉二州水

慶元六年饒信大水自庚午至甲戌流民廬害稼

嘉定二年秋八月己巳信州火燔民廬二百家九年夏五月信州大水

以上俱豫章書

淳祐十二年壬子大水高於城東北隅無留甃

舊志

景定四年癸亥發米三萬石賑衛信饑

咸淳一年丙寅嚴衢婺台處上饒建寧南劍邵武大水遣

使分行賑恤存問除今年田租

德祐元年五月甲午饒信州饑

以上俱宋史

元

泰定元年春正月信州上饒饑

豫章書

元統元年五月信州地震

至元四年六月靈山裂

五年二月雨土

以上俱豫章書

至正十一年冬十月信州雨麥

綱目

明

永樂三年大雨溪流暴漲泛溢通衢瀕河之民湮沒無算

舊志

十四年大水

宣德八年大水壞公私廬舍數百溪谷易處歲大祲

十六年十月雨麥

二十年九月地震房屋有聲

以上俱舊志

按通志載成化中歲饑上饒饑民搶奪郡以行劫報
叅政李蕙議止戮其渠

宏治十六年元日昧爽廣信有星流於東北

豫章書

正德二年夏四月不雨至冬十月

舊志

四年雨黑子如梧實

五年雨雹大如鷲卵壞廬舍折木殺禽獸禾稼盡傷

六年雨黑麥種之葉如戈戟

八年十一月雨雪二十日溪沼冰花宛如樹形

以上俱舊志

九年八月朔晝晦星見

通志

十年八月辛卯日食晝晦

舊志

十五年四月大雨雹殺飛走拔大木五六月大水壞田廬

民以饑殍

舊志

十六年元旦昧爽有星流於東北赤光如帶

嘉靖元年五月淫雨其年澇傷無麥禾

八年大水人城湮沒豫備倉及公私廬舍

以上俱舊志

十四年四月大水

豫章書

四十年四月大雹殺菽粟傷牛馬無算舊志

萬曆九年四月大風雹驟雨如注牆屋圯大木斯拔舊志

十七年大饑五月至八月不雨疾疫餓殍交橫於道

十八年大旱冬淫雨菽麥沍萎

十九年秋七月永樂鄉水自大橫嶺石罅出瀾漫至楊家

店湮沒民居二十餘家淤塞田疇二百餘畝

三十二年冬十一月初九夜地震聲聞數百里

天啟二年癸亥大水河流冲激浸汨城櫓

崇正元年戊辰七月十九日大水拔木田廬人畜多湮沒

禾稼傷

八年三月初三日冰雹自西北至大如鷄卵五月朔夜暴

雨大水自玉山來瀾漫城邑兩日始退鍾靈橋圯以上俱舊志

張應詒有五月行 三月冰雹良可惡元氣祇今尙

蕭索五月一日蛟龍闕翻江排山恣為虐夜半家家

正睡熟驚聞四面人聲哭平地水忽二三尺未及轉

眼高於屋更無燈火雨如注夫妻父子何暇顧望誰

引手一來援忙跋屋脊或攀樹可憐屋漂樹又倒生

死浮沉安可保死者已矣生轉悲一身之外都為掃

十家九家無栖枝千人幾人不啼饑死溺死饑同一

死况復征徭又迫之捐摩賴有使君賢先為開倉徐

請蠲下令催科立停止流離困苦得生全生全還把

喘待須臾

九年丙子五月熊入城止林姓屋上舊志

十二年六月朔闕闌坊火延燒三百餘家舊志

十六年冬十月初九日龍見隨有五彩雲擁護陷橫塘一

畝濶深十餘丈通志

國朝

順治三年丙戌大旱豫章書

四年丁亥大旱斗米八錢民採山中石粉和米作餅因相

傳為仙粉舊志

十七年庚子縣署後棟產靈芝一本舊志

十八年辛丑夏五月至六月霖雨害稼舊志

康熙二年癸卯三年甲辰四年乙巳五年丙午俱旱舊郡志

六年丁未夏五月霖雨田禾澇傷無籽粒舊志

九年秋七月旱禾盡稿冬積雪深五尺人畜多凍死舊志

十年辛亥夏五月至秋七月不雨蟲食禾稼盡則食木葉

民採蕨拾橡以為食次年春巡撫董衛國首倡捐賑司府廳縣各捐俸有差發常平計捐穀七

千六百餘石分賑饑民賴以全活 舊志

十一年壬子南北鄉麥秀雙岐舊志

十七年戊午大旱無禾舊志

十八年己未旱歲大祲舊志

二十五年丙寅四月二十四至二十七大雨不止河水漲

溢入城深五尺餘居民漂沒無算水災無過於此七邑皆

同巡撫佟康年借省倉南漕二萬石
據貴溪鉛山志增

三十一年壬申夏秋亢旱舊志

四十九年庚寅十一都地震舊志

五十一年壬辰大有年舊志

雍正九年辛亥六月三十日大水萬安橋圯舊志

乾隆四年己未正月十九日南門外火延舊志

營署隙地產靈芝一本五年六年復產舊志

八年癸亥自正月至五月霖雨不止穀價騰貴知府陳世增知縣汪

文麟發廩平糶又勸諭富民借糶並行民賴以甦
舊志

八年十二月西北有星出白氣如練至九年正月中旬始

退舊志

九年甲子夏大旱七月初六夜大水鍾靈橋靈溪橋俱圯

舊志

十六年辛未夏大旱米價六兩據廣豐志增

十八年癸酉夏五月至九月不雨據廣豐志增

天文 祥異

按廣豐游令惠里記載乾隆十六十八等年江右東
數郡米價騰湧是信屬七邑皆然矣故增入

三十五年至三十七年雨暘時若三載豐登

四十五年夏雨暘時若大有年

上饒縣志 卷二

地理

沿革 風俗

形勝

疆域

都鄙

山水

物產

秦漢置邑當今一大郡後乃瓜區豆剖愈析而愈隘

顧觀其陰陽向背流泉高下域民以疆界者徃徃若

天造地設焉物產視土之所宜美惡恒相什伯吉凶

儀節雖百里而不無小異同因而利導之接人用權

非必強民以從我也坊記曰上酌民言則下天上施

盤庚之誥詰屈聳牙朱子謂其中間雜方言衙談巷

語亦長民者所由以旁通民情哉志地理

沿革

上饒本漢豫章郡鄱陽縣地孫吳置上饒縣以其在饒州

之上也郡縣釋名

上饒屬揚州境在古為荒服在春秋為楚越之交吳伐楚

取番陽遂為吳地吳滅入越越亡復入楚秦併六國置郡

縣上饒為九江餘汗地漢改九江置豫章為豫章餘汗地

吳建安十五年析餘汗置葛陽縣為鄱陽郡葛陽地晉因

之隋大業三年復析葛興人葛陽置弋陽縣唐武德四年

復葛陽置上饒隸饒州又析葛陽西境置玉亭七年省上

饒人弋陽唐乾元元年江淮轉運使元載請置信州乃復

弋陽地為上饒縣又析上饒地置永豐縣屬信州隸江西

採訪使元和七年省永豐入上饒宋平江南隸江東道熙

寧七年復析上饒之永豐鎮為永豐縣上饒於是無畫壤

元改信州路隸浙江行省明洪武二年胡大海拔信州上

饒屬廣信府隸江西布政使司

國朝因之編戶九十九里前志

按廣豐前志洪武四年鄆中余德讓疏廣信隸浙江漕運不便請改隸江西布政使司則云洪武二年者非也且按嘉靖林志洪武九年革中書省置承宣布政使司則洪武二年不應有布政司之名今并志於

此以揆博古者考核焉

形勝

形勝

地脉本靈山七十二峰障其北銅塘鐵山峙其南東有懷玉瑯琊諸峰西有黃沙馬鞍諸嶺高溪橫貫其中合眾流出乾兌之交可扼閩越之喉可通吳楚之境洵豫章左偏

雄鎮也

前志

鷺湖博山龜峯懷玉號稱形勝而靈山尤秀絕

宋釋覺範天寧寺

記

靈山秀峙饒江澄凝

張元自記

吉陽陡起實為少祖東接玉溪靈溪二水之流西匯丁

豐溪二流之合

前志

疆域

縣橫廣一百里袤一百七十五里東陸大路自東門五十五里至太平鄉黃茅岡玉山縣交界西陸大路自西門五十五里至石橋鄉宋村舖興安縣交界南陸大路自南門鍾靈橋四十五里至上饒鄉菱塘廣豐縣交界西南小陸路自白鶴渡四十五里至乾元鄉石溪鉛山縣交界南小陸路自灘頭渡口一百五十里至福建崇安縣峯陽關交

界北小陸路自城一百三十里至安輯鄉渾港嶺饒州府
德興縣交界水路上由廣安橋六十里至湖昏塘汎玉山
縣交界下由鍾靈橋白鶴渡六十五里至葉青洲沿山縣
交界

都鄙

舊志十三鄉四隅七十都都隅廣者有畝在都爲里在隅
爲廂明嘉靖三十九年始割安輯鄉之十五都十七都十
八都十九都二十都二十四都二十七都又石橋鄉之三
十一都增置興安縣今存六十二都八十六里并四隅十

三廂共九十九里

前志

按宋前皆以縣統鄉以鄉統里太史公傳老子曰若
縣屬鄉曲仁里是也改鄉曰都改里曰圖自元始圖
今省作畝謝少連歙志曰畝音鄙與左氏傳所謂都
鄙有章者合矣邑稱號各有不同皆得以都鄙統之
城內外曰坊隅

德禮坊

德化坊

政教坊

以上三坊俱縣治西府前大橫街東抵玉溪門西抵
白塔巷

關闈坊

信美坊俱在譙樓下大橫街東抵玉溪門西抵關闈門

武安坊府左直街

盈濟坊府右直街

閱武坊在縣治右府後街由倉嶺抵香濠門

富有坊在縣治西北大德寺長街

耆德坊爲宋侍郎鄭望之名在縣右鐘樓下直街

以上屬城隅

豐樂坊

太平坊

泰定坊

泰安坊

以上四坊在關闈門直街東抵城門西抵關

常寧坊

旌孝坊

狀元坊

豐財坊

通濟坊

阜民坊在草市

以上六坊屬西隅

叢桂坊在東隅大街東抵更樓西抵玉溪門

嘉寧坊在南隅皇華亭東

德濟坊在南隅皇華亭西

前街東通玉溪門西通白塔巷北抱府治南通譙樓門

後街東通西街西通獅子巷北通靈山門南臨府治

西街東通闔闔門西通西關北通後田街南通草市

闔闔市東通玉溪門西通闔闔門南通廣信門北通譙樓

草市在闔闔門外西南東通平政橋西通陶家埠南臨水

溪北通西街

進賢鄉附郭領隅四廂一十三

城隅 一 一 二 二 三 三 四 四 東隅 一 一 二 二 三 三 四 四 西隅 一 一 二 二 三 三 四 四 南隅 一 一 二 二 三 三 四 四

崇孝鄉在縣東領都三里五

一都 一 一 二 二 三 三 四 四 二都 一 一 二 二 三 三 四 四 三都 一 一 二 二 三 三 四 四

明達鄉在縣北領都四里六

四都

五都

一畝

六都

一畝

七都

二畝

靈山鄉在縣東北領都四里五

八都

一畝

九都

二畝

十都

一畝

十一都

二畝

石人鄉在縣北領都三里五

十二都

一畝

十三都

一畝

十四都

二畝

安輯鄉在縣西北領都三里六

十六都

二十一都

二十二都

二十三都

二十五

都

二十六都

都

都

都

都 二十六都

石橋鄉在縣西領都六里八

二十八都

二十九都

三十都

三十二都

一畝

三十

三都

三十四都

一畝

三十五都

開化鄉在縣西領都六里八

三十五都

三十六都

三十七都

一畝

三十八都

二畝

十九都

四十都

一畝

四十一都

乾元鄉在縣西南領都五里六

四十一都

四十二都

四十三都

一畝

四十四都

二畝

十五都

永樂鄉在縣南領都一十一里一十一

四十六都 四十七都 四十八都 四十九都 五十
都 五十一都 五十二都 五十三都 五十四都
五十五都 五十六都

來蘇鄉在縣南領都五里七

五十七都 五十八都 五十九都 六十都 六十一

都 一箇二
箇三箇

上饒鄉在縣東領都六里一十三

六十二都 一箇二
箇三箇 六十三都 一箇
二箇 六十四都 一箇
二箇 六十五

都 一箇二
箇三箇 六十六都 一箇
二箇 六十七都

太平鄉在縣東領都三里六

六十八都 一箇二箇
三箇四箇 六十九都 七十都

鄉亦有以坊名者

石橋坊在石橋鄉去縣治西三十里

元溪坊在永樂鄉去縣治南五十里

沙溪坊在太平鄉去縣治東五十里

鄱陽坊在永樂鄉去縣治南六十里

黃埠坊在靈山鄉去縣治北三十五里

私路口坊在石橋鄉去縣治西五十里

月巖坊在石橋鄉去縣治西三十里

封坑口在石橋鄉去縣治西三十里

石溪坊在乾元鄉去縣治西南四十里

山水

靈山 在城西北七十里道書列為三十三福地邑之鎮山也山高數百丈綿亘百餘里溪五派西流入上饒溪山有七十二峰 石屏峰居中位其形方正儼若列屏巔有潭深不可測唐天寶中相傳有龍居此遇早禱雨輒應因名龍池飛泉瀑布高懸百丈遠望如竦雖數百里外皆見 石人峰在東北孤石挺立如人下有石井石室中為石人祠峯上有詩刊於石壁無名氏採石耳者見而錄之詩云同友來登石人峯峯頭不見葛仙翁飛應作雲外客客亦難探石上松松間子規啼夜月月月中丹桂補秋風風吹處處山花落落盡山花景不同 馬鞍峯在石人峯

東 棋盤峯在馬鞍東 紗帽峰在棋盤東 龜不峯在紗帽東 圭峯在龜不峯東 雙石峯在圭峯東 兩石相聯在花巖南下有聖井旱禱輒應 栢頭峯在花巖南與雙峰相對 鷹嘴峯在石人峰西南 疊浪峯在鷹嘴西 迴龍峰在鷹嘴西 黃沙峰在迴龍南兩峰相對下有峰頂院 巖前峰在迴龍西下有養真巖胡昭公學仙於此號松谷老人後居民立祠祀之前有石塘清泉不竭祈禱多驗 燃燭峰在養真巖後 南塘峰在養真巖南 百谷峰在南塘峰前 龍泉峰在南塘西 笑天獅峰在龍泉西下有石泉當北鄉孔道有亭名永世亭 水晶峰在遮嶺後懸崖瀑布飛瀉映日望若水晶 遮嶺峰在石洞西 疊石峰在石洞西南怪石高懸竒特人經其下望之若將墜者 登樓峰在石屏西山勢登上如階級歲三伏日人登石屏燃香多從此攀躋而上因呼石階梯其最險處於兩崖石竅中置棧橫大鐵索二丈許行者以手扶索循崖而渡稍下視則膽落矣 粧臺峰在石屏東 粉盒峰與粧臺相聯 掛衣峰在粧臺東形似衣桁 望郎峰

在掛衣東俗呼老嫗峰 白雲峰在石屏西 草堂峰在
 白雲峰南下有草堂相傳胡隱若居此 披雲峰在白雲
 峰下 聚講峰在白雲峰西 鼠捕峰在聚講西 龍峰
 在鼠捕西 東臺峰在龍峰西 老鴉峰在東臺西 石佛
 臺右 朝天龜峰在鞋峰西 天梯峰在石佛西俗呼上天梯 中臺峰
 在天梯南下有中臺菴明養菴禪師居此 插旗峰在天
 梯峰右石竅圓深可卓旗下有洪梁洞 方石峰在中臺
 西 龍頭峰在申臺西山石陡起下可列騎而過 圓墩
 峰在龍頭西 鞋石峰在圓墩西 老人峰在鞋石西
 西臺峰在老人峰西下有西臺菴 水尖峰在西臺南 龍鬚峰
 在汨汨自石中出西流入溪 華表峰在西臺南 龍鬚峰
 在水尖西 石合峰在龍鬚西兩石相合人潛撫之則動
 相傳葛仙翁修煉處壇址尚存 鳳凰峰在石屏西 西峰
 對列如鳳凰交鳴 石獅峰在靈山東北 九牛石
 南列石有九狀均如牛 員山峰在石獅西下 石
 菴 春鳥花峰在員山西石色紅如杜鵑 天馬峰在石

人峰北 天半人峰在天馬東北形如偃月下有泉潺湲
 不絕名北澗響泉 五洋峰在月峰北 黃泥峰在月峰
 西山多黃土亦名黃土嶺有路通徽饒境 道士仙峰在
 靈山北相傳有道士修真於此後仙去下有洞風氣往來
 輒有聲名仙洞鳴琴 頂心峰在靈山北羣峰之中其峰
 獨尖聳 三十六尖峰在靈山北震峰森列銳如卓筆凡
 三十六數下有龍湫水常溢出各陽際靈湫 銅峰在靈
 山北石色如銅其麓有七星潭天然石穴清可沁心數有
 七布列如北斗 白石峰在銅峰西 高城峰在白石西
 最高峻 船石峰在高城西 上下南峰在高城南 齊
 眉峰在南峰西 兩峰並峙如眉

宋韓元吉詩

嶽鎮古所錄茲山諒真遺憶從西江

來恍惚忻見之初疑春雨晴雲物出怪奇稍稍對
 壁森森面嶽崎紛紜類列障散漫如連帷磅礴千里
 間象景皆奔馳頗訝地軸漏未覺天柱虧不知崑崙
 高遂使秦華移諸峰七十二磊砢畧可推駢觀擁佛
 髻遠睇凝婦眉大或覆鐘鼎細亦鋸刀錐石櫃一何

高梯天此爲堦崩騰鐵馬羣中有大將旗身居萬石
貴氣壓累耶危維傑旣莫狀清深亦餘姿蛟螭護絕
磴草木忘四時定知水晶宮闕藏神所司飛泉瀉餘
怒勢作千丈垂葛仙煉丹成空聞龍化陂遺休被山
川勝概毋乃私其東沐金鵝其西暴元龜洞雲倚長
空岩月隱半規龍電衛方壇至今傳道師延連堊玉
地聳秀尤相宜分明別長幼次第論崇卑袂將九華
接肩與廬阜隨孰云東南傾擎持端在斯會當歷其
巔不但一管窺雖微始皇頌儻有神禹碑鄭日奎
望靈山詩茲山何秀拔百里引瞻視人代幾戰爭山
自終古翠攢峰七十二奇詭不一致雷雨隱其中日
月跳相避深窈望不盡但驚巖業勢應有採芝人高
隱雲深處我欲往從之討以山中趣年年遊屐阻臨
風空感喟夏尙朴舟中望靈山詩南津市前春水
生荒砂斷磧渾欲平老天知我有遠適昨夜雨雪今
日晴平頭艇子夾雙檣啞啞時向中流鳴更雷南風
一雨帆舟人束手篙齊停呼童爲我挾短几多船
頭風日清晶晶波光射人眼眼底不覺生芒稜坐來

引睇不能視抬頭喜見靈山青靈山有峰七十二青
山削出何峻嶒誰知可望不可卽狂吟坐此招山靈
都從史高明詩靈鷲山爲吾郡鎮岩岩氣象奉華
俸上支天柱七十二下孕水晶千百秋地拔車吳控
荆楚星分南斗介牽牛時當亢旱吐雲霧大作甘霖
遍九州大學士夏言詩立壁峭巖森似戟措峰懸
嶠蹙如螺九華五老虛攬結不及靈山秀色多方
洋題靈山飛泉詩萬山深處見飛泉直瀉河流下九
天亂石驚衝珠珮碎輕雲高擁玉龍懸雨花晴洒蒼
苔潤冰溜寒重碧澗連袒裼縱觀情自樂水晶簾外
坐神仙

山爲府治鎮山故首列之

銅石山

在城南百餘里詳阨塞

山爲阨塞重險故繼及之

南屏山

在溪南從狼牙山發脉拱抱府治如屏又以形如奔駒別名天馬山宋趙汝愚建南臺于上後廢旁別建謝文節公祠今奉主同文文山合祀於信江書院春風亭朱晦菴祠

狼牙山

一作瑯琊山在南屏山東以峰勢尖聳故名中有東嶽廟後為文昌殿左為聖母殿右為睢陽祠

道觀山

在溪南山石雄踞為邑治右障上有谷神道院舊志有溪山堂含輝閣樂歲樓信美亭皆廢前知府張國楨創曲江書院於山麓後知府周鏞元昔為靈講院知府陳世增改為紫陽書院乾隆四十六年知府康基淵改為信江書院此山并入院基上建萬錦書屋有記詳書院

文筆峰

在溪南山峰秀拔與府學相對故名 前志

鐘山

在溪南祥符寺前形如覆鐘上有跨鶴臺已廢 前志

覆盂山

在溪南山祥符寺當佛殿前如覆盂 前志

茶山

在城北唐陸鴻漸遊寓於此號東岡子刺史姚崇於所居鑿沼為溟渤之狀積石為嵩華之形後隱士沈洪喬復葺居之

唐皇甫曾送陸鴻漸採茶詩千峰待逋客香茗復叢生採摘知深處烟霞羨獨行幽期山寺遠野飯石泉清寂寂燃燈夜相思一磬聲 明鄭文恪詩棠葉黃兼相藥紅郡城遙與化城通種茶逋客今何許千百鳥羣呼 午風

五馬嶺

在邑城西北二里許刺史姚驥因訪茶山陸鴻漸道經此故名 前志

以上皆附治近山

吉陽山

在縣北十五里崇孝鄉縣之少祖山也旁有蓮花石繖文如蓮瓣坐可移日 王汝弼秋日登吉陽

山詩秋風生短袂乘興偶然來蓮石晴雲掃松塔尋
露開僧殘知寺古山合見龍迴被帽簪花倒相看不
厭顏 鄱陽王大堅遊古陽山詩有一
客怡分花一朶花心陳設蓮花宮之句

烏鷹巖 在縣北明遠鄉靈山南麓時有鷹
巢於此故名今為僧舍 前志

石城 在縣北明遠鄉靈山南麓峭石壁立迴環如城前有
門中寬廣可廬而居避寇者多入其中蓋天然險隘
也前志

鰲頭嶺 在縣東北八十
里靈山鄉前志

柘嶺 在縣東北八十
里靈山鄉前志

鉛石山 在縣北四十里石人鄉石屏秀峙岩壑瑰異清池
峻嶺與靈山低昂山麓有真武殿大士堂左

鉛嶺巷曲仄盤旋
為北鄉之勝前志

三十六折嶺 在縣北安輯鄉盤紆曲折凡
三十六數始達嶺表前志

石橋山 在縣西三十里石橋鄉其上平坦如橋山半一穴
嵌空遠望如月又名月巖宋朱喬年有鑿透巖巖
不記春山腰千古

掛水輪之句府志

唐韋莊經月巖山詩驅車過閩越路出饒陽西仙山
翠如畫簇簇生虹霓翠峰若侍從衆阜如嬰提巖巖
互吞吐嶺岫相追搆中有月輪滿皎潔如圓珪玉皇
恣遊覽到此神應迷婦娥良夜被引我同攀躋騰騰
上天半玉鏡懸飛梯瑤池何悄悄鸞鶴烟中樓回頭
望塵世露下寒淒淒 元趙孟頫詩月巖如假月風
泉麗晴雪仙境在

人謂真成兩奇絕

婦石 一名緝女石在縣西三十五里石
橋鄉山頂如毼又名毼石府志

大泉巖 在縣西石橋鄉雲洞側中有僧舍不假瓦覆巖盡
處有泉自石罅出涓滴不竭幽勝與南巖埒前志

給諫呂懷詩杖竹來雲洞紫紆一徑微珠簾晴欲捲
玉漏點初稀北闕星辰近南山日月輝看泉過別島
不息是

神機

九仙巖

在縣西二十五里石橋鄉巖心有石大如

箕四時常潤天欲雨則聞滴籥聲前志
明侍郎楊時喬詩鍾靈佳氣滿山浮苔蘚嵐烟翠色
幽滿滴半空傳雨信臺陰十里障江流龍飛漢表雲
歸鉢虎嘯林邊風到樓我問山

僧能解意夜深燈火爲人留

黃沙巖

在縣西四十里石橋鄉空嵌可容百人
巖後有兩泉自石出溉田十餘畝前志

以上自一都至三十四都諸山

龍潭石

在縣西五里開化鄉舊爲長史遷擢宴送之所饒
江豐溪二水合流至是有石屹然雄踞溪澗下漚

重潭古有篆書龍潭二大字鐫於石壁明萬歷間建
見龍塔塔成尋圯僅存三級舊有五龍廟祀惠濟夫

人已廢

前志

烏龜山

一名五桂山在縣西南五里開化鄉諺云水打烏
龜石信州出狀元宋徐元杰嘗應其識云府志

烏石山

一名溪旁山在縣南七十里開化鄉形勝巉巖如
累黑玉山半有穴橫深十餘丈中有石觀音一座

前志

仙山

在縣西二十五里開化鄉山勢幽絕欲雨則雲蒸明
崇正間守道貢修齡建龍王殿於上下有龍井雩壇
相傳山巔有空棺村民迎以禱雨輒應禱畢昇
至山中盪旦視之則上并稱之曰仙板府志

明鄭邦福詩任世心情無一分巖棲借此實離羣
猴絕壁行相戲鸞鶴層霄坐或聞仙蛻已知飛白日
空棺猶自閣重雲到來岑寂

居山

一名金鐘頂在縣西南十里
開化鄉有徐真馬祠前志

粧臺山

在縣西三十里開化鄉國類雜盒與迷石相對有鄭平真仙廟前志

焦石

在縣西二十里開化鄉石色赤黑面瞰溪流亦有古亭為往來津渡處前志

接巖

在縣西開化鄉石室寬廣僧舍數楹唐武德中錫處後廢明天啟間僧三應復建教諭彭登書接巖二字鐫於巖表

玉鸞有記鐫石上

曹鳴遠詩懸巖落松關怪石寒雲護中有無字禪靜者自能讀

曹鼎望詩聞道接巖好今朝始悟登手竿環翠壁一窟納羣僧山僻塵緣淨林

白雲巖

在縣西二十里開化鄉巖谷幽異隱隱在白雲中明養菴和尚創梵宇於此前志

過巖

在縣西開化鄉雲洞後前志

一線天洞

在縣西三十里開化鄉雲洞前峭石劃然中分一線前志

明鄭邦福詩鐵壁雙關一徑衝似龍獅象列諸疑山鬼深林出忽起厨烟隔竹濃入坐儼然天尺五望雲如脫夢千重三生石上俱忘盡可怪詩魔一再逢

雲洞

在縣西三十里開化鄉天欲雨則興雲前志

韓元吉詩揮策度窮谷撐空見樓臺丹崖幾千仞中有佛寺開老僧如遠公應門走蓬萊下馬問所適蹇衣指崔嵬飛欄倚石磴曠蕩無纖埃坐久意頗愜爽氣生尊巖仙棺是何人白骨藏莓苔舉酒一酌之慨然興我懷丹砂固未就白鶴何時來不若生前樂長嘯銜此盃 明鄭邦福詩碧天連夜洗新秋與客雙跌最上頭月白臨巖堪自捨心空無語亦相投竹根石劃虬龍窠峽圻靈通虎豹豕願共此生常此際一龕之外復何求

天靈洞

在縣西二十里開化鄉石室深邃內有天憲映日俗呼透光巖

以上自三十五都至四十都諸山

蟠山 在縣南五十里乾元鄉嶺有葛仙廟前志

馬鞍山 在縣西四十里乾元鄉一石旁溪形肖馬鞍前志

包公尖 在縣西南乾元鄉接鉛邑界一峰尖聳奇拔前志

黃沙嶺 在縣西四十里乾元鄉高約十五丈前志

羊石 在縣西南二十里乾元鄉石突起高十數丈儼如羊眠肢體皆具前石廻顧後峰環列明侍郎葉鏞家此因名曰羊

石里府志

八仙臺 在縣南六十里乾元鄉峭石高聳寬廣如臺居民祀八仙於其上俗傳有上下入洞云前志

雲巖 在縣南六十里乾元鄉巖峭拔雲氣往來中空如室有石觀音半面羅漢等形宋理學余正叔構廬

書其中

洪巖 在縣西南三十里乾元鄉臨溪一巖中有僧舍周圍竹木幽蔭可玩左有洞穿透經遊者出入儼如石門

前志

柱石巖 在縣南六十里乾元鄉峭石拔起屹然一柱中有巖相傳徐仙姑得道處前志

南巖 一名盧家巖去縣南十里豁然空嵌可容數百人下有僧舍十數楹不假瓦覆雖大雨無簷漏聲府

志

晁謙之詩南巖夫何為山作天倚蓋山南溪山複飛頂覆其外初如鵬將翔鵬繫羣麓背乍似海獸嘯呀口噉而嘖當空橫廣額架屋喉舌內嘗聆釋氏說仰覆各世界千間未可着五畝良不隘清冷氣射人熱橋從此潰崖奔木疎瘦峇遠鳥怪鳩予與二子高典偶相戒松舟下清江毛髮數緞解籃輿上峻嶺幢

節望杉檜李侯勲門胄文采山作繪趙君儒林孫娉
 羨蘭結佩不為城府遊繼此日子邁寧知老逾拙意
 在精賞退得居溪南幽食飲與山對夢魘入與冥雲
 雨出神滄頤此誠未逢欣然與心會彭湖兩崖蹙泉
 作一線霽禪月古臺空靈山自明晦平生所驢使詩
 酒俱好在天涯得吾侶物外從所快便欲登赤城一
 觀天宇大長洲丞張文煥詩萬仞石補天一線天
 補石霹靂叫重門星辰掛危壁雙龍其肺肝五姥其
 鼻額道陵戰獅子讓與紫陽席李空同詩巖高屯
 屋巨谷遠至跡罕仰之訝天缺登頓陡雲滿木零鶴
 巢露松冷猿嘯緩一漪聆不厭五級裒可踐宋朱
 晦庵詩南巖梵率境形勝自天成崖雨檻前下山雲
 殿後生泉堪清病目井可濯塵纓五級峰頭立何須
 步玉京明少詹黃道周詩逋客為官舍離家仍鑿
 山泉心看物破雲踵置人間黔突隨征鳥空巢托掩
 關長安座匪盡誰共寫滌溪韓元吉詩官曹為領
 無時空一春蹙蹙塵埃中溪南十里巖谷好俗筆屢
 整無由窮前時相邀雨斷道今晨不雨天亦風及知

書十不解事句以怪澀動天公興來避遊始一往相
 與縱轡隨飛鴻野棠着子梅杏老密葉尙帶殘花紅
 崢嶸屋宇吁可怪毋乃開闢煩豐隆卻尋危徑山巉
 絕俯仰曠野迷西東涓涓寒溜滴冰雪一酌為我涼
 心胸山川何曾歲月計可憐翠阜分磨礧人生歡笑
 不易得此會幾許誰能同春禽正喧日已暮歎我歸
 期還匆匆辛棄疾遊南巖和范先之詞笑拍洪崖
 問千丈翠巖誰削依舊是西風白鳥北村南郭似整
 復斜僧屋亂欲吞還吐林烟薄覺人間萬事到秋來
 都搖落呼斗酒同君酌更小隱尋幽約且丁寧休
 負北山猿鶴有鹿從渠求鹿夢非魚定未得魚樂正
 仰看飛鳥却應人回頭錯廣南知府葉鵠歌天匠
 雕龍構倏忽沙壤為鱗石為骨昂頭指欲排天根蟠
 旋便已成雪窟欽崎空洞屯飛屨巉嶙穿壑驚欲下
 金衣丈六天竺來木馬嘶風野芙蓉翠削山之
 東披茸踞豹多奇踪五級峰頭蘇封磴登閣縹馬窮
 驚龍玉盤承露有餘瀝泉根滴瀉過靈石烟波到處
 結奇遊翻吾刻述詩留壁美人攜琴坐石旁林橫黛

翠如錦張巖浮雲際月窟近秋風散下黃金香樵歌
款乃迷歸路林暉落照巖先暮新礪古錯墨題處正
對嶺頭
一株樹

以上自四十一都至四十五都諸山

鐵山 在縣東南六十里永樂鄉舊常
治鐵後竭更名丁溪山府志

銅山 在縣南四十里永樂鄉方輿記云下有天井廣丈餘
有石倒懸如蓮花其水碧色莫測深淺春夏不竭天
欲雨井中即白

霧上騰府志

湖古山 在縣南百二十里永樂鄉山嶺一池中有
元帥廟在焉祈禱多應因名其池曰聖

錦屏峰 在縣南六十里永樂鄉周邨山色秀麗
嶺平正舊建禹王廟下有周氏天恩堂

紫草山 在縣南七十里永樂鄉山勢崧崧
紅瓦二十里有古佛寺已廢前志

鷄鳴峰 在縣南永樂鄉周邨兀然挺拔如鷄冠首
下有宋狀元徐梅楚故宅遺址尚存前志

五彩峰 在永樂鄉鷄鳴峰左五峰疊峙勢如漸湧蔥蘢
翠秀色可人明知府金銑過其地望而喜曰峰嵐
多彩色因以五
彩名之前志

鷺山嶺 在縣南八十里永樂鄉高峻紆折
垂五里許通閩界岑陽關前志

高洋嶺 在縣南八十里永樂鄉峻崢嶸
升降凡十里許嶺南即高洲前志

鐵山嶺 在縣南八十里永樂
鄉路可通閩前志

斗米嶺 在縣南八十里永樂鄉路通閩省相
傳嶺存石罅曾出米飯僧故名前志

岑陽嶺 在縣南永樂鄉嶺勢巖崑上侵雲表攀躋者
肩踵相接江閩自此分界設關戍守前志

北嶺 在縣南八十里永樂鄉其嶺寬廣約百畝居民即山
種藝儼成村落山泉灌溉四時不竭嶺南接岑陽關

地理 山水

前志

西巖 在縣南六十里永樂鄉巖門有石如鐘
覆地中有懸石如螺滴水味甚甘冷

以上自四十六都至五十六都諸山

大橫嶺 在縣南五十里來蘇鄉當入閩孔道
山勢陡起橫亘直出溪澗故名前志

虎隘嶺 在縣南二十里

冷水嶺 在縣南二十里來蘇鄉崖石突起下瞰溪流
下流南行至是滙為潭水深而冷故名前志

七峰巖 在縣南二十五里來蘇鄉巖壑奇秀唐
淨空禪師卓錫處巖陰屬廣豐境前志

本洲山 在縣東南十五里上饒鄉山
勢峻為邑治左障前志

青金山 在縣治東南二十里上饒鄉三峯巖峙鵝峰尤為
秀拔多洞壑怪石中有漢高帝廟祈禱輒應

廣豐境前志

秦峰嶺 在縣東五十里上饒鄉形勢高聳圓如覆釜
一名鷄籠山上舊有廟下為秦山寺前志

黃尖峰 在上饒鄉接廣豐境
山半一巖中祀八仙

青巖山 在縣東三十里太
平鄉有古寺府志

明鄭邦福詩薰風長日遠迴廊飲後尋僧納
晚涼自嘆俗緣猶未竟襟裾空帶積厨香

黃巖山 在縣東五十里太平鄉山半有巖如室中有泉自
石竇出味甘美上有觀音殿潘元帥祠其巖高圓

如甌俗呼飯
甌山前志

以上自五十七都至七十都諸山

羊角石 在靈山北有
石岐如羊角

馬蹄石

在石人峰下李將軍祠前相傳神助王師討賊馬足躡石蹄痕宛然時有泉溢出飲可愈疾前志

宋尙書姜夔詩青壁高懸雲氣堆將軍從此識龍媒至今芳草寒泉外猶似當年破賊回

跨鶴臺

在萬錦山頂

陳文蔚詩臺據高峰最上頭登臨人世一浮漚塵囂到此都忘盡直欲乘風跨鶴遊

以上三名未詳鄉都附識山後

上饒江

一名高溪在南門外上溯玉山下經弋貴流入饒州府境卽朱晦翁所謂高溪也費文憲宏題廣信

地理圖亦云信之境東抵浙南抵閩西與北接撫饒二郡山之大者若懷玉鷲湖龍虎皆有聞於天下高

溪水貫其中清激湍駛前志

張祜詩碧溪行幾折凝權宿汀沙角斷孤城掩樓深先月斜夜橋昏小氣秋竹靜霜華更思會題壁洞客

可嘆

嗟

馬道畊放生河記廣信府故高溪也由南部暨鍾靈橋上下延袤里許前郡守張國正勒石兩間曰放生河禁罟網之入積之有年滋生日蕃魚若有知咸趨聚於中噉噉噉以億萬計憑橋楫觀之從容而樂往來者指此不善濠梁間張守解組繼之者佯弛其禁以爲非儒者之務而漁之黠與民之無賴取之若寄而魚又若有知咸趨以散去亦幾年所矣今太守周嵩山至復嚴其令漁盜民竊舉寘之法屬司橋者至守之魚仍若有知咸趨聚如故易曰信及豚魚聖人豈欺我哉余維魚之爲物見於舟而爲聖王之兆形於夢而爲詩人之託或陽鱗以喻政或前魚以徵寵懸之爲廉吏之表見生之有昆明之報德太守豈有意耶亦惟推人及物盡我之誠而孚物之應不期而至若有靈然安得詣赤鯁公於水濱而問之將曰子非我安知我不知乎吾當質之莊生

水磨灘 在城西半里許灘石壘壘
至秋輒涸舟行維艱前志

君遷潭 即龍潭

甘里潭 在縣西三十里水深停蓄兩岸
石壁如削凡二十里餘前志

牛眼灘 在縣西二十里中有兩石如牛眼水
勢震急舟行時有觸溺之患前志

白石潭 在縣南三十里來蘇鄉冷水
嶺下岸多白石因名前志

梅潭 在縣西四十里乾元
鄉接鉛邑界前志

五里淤 在縣東四十五里太平鄉明
大學士鄭文恪世居此前志

鄭文恪詩水流百里忽瓊瀾潭樹稠圍五里淤沙
盡栽諸葛菜水田飽喫任公魚草堂更在玉山
下仙子清分黃石餘圭里即今
還上世相親箇箇說佃漁

沙溪 在縣東
十里

鄭文恪有詩云履聲新較北
門扉詎許沙溪薜荔衣前志

以上中流大溪水

九股松溪 在縣西十五里開化鄉岸有古松一本
九幹經千百年蒼翠如常故名前志

靈溪 在縣東北二十里靈山水南流百
里至此合玉山水入上饒江府志

明大學士夏言詩纔向龍岡掃墓田靈溪又泛鄭坊
船長安十載松楸夢今日家山聞杜鵑 又人靈溪
口詩危橋跨水玉虹流渺渺春波畫鷁
浮百里雙溪初入口龍岡山下是源頭

楮溪 在縣西四十里開化鄉發源靈山西南流入上饒
江岸多楮木因名或以衆流所會故稱諸溪府志

靈山水 在縣東北二十五里崇孝鄉源出靈山
南流百里入上饒江可通舟楫府志

上饒縣志 卷二 地理 山水

宋溪 在縣西八十里石橋鄉源出靈山西流百二十里入上饒江相傳宋氏曾居溪側唐天寶六年勅改爲宋氏水

府志

以上北岸支流小水

鯉洋 在縣東六十里太平鄉鄭文恪讀書於此前志

破石水 在縣西六十里乾元鄉源出建陽界北流六十里入上饒江可通小舟前志

峙溪 在縣西二十里源出石橋鄉東流五十里入於永豐溪可通小舟府志

瀘溪 在縣南五十里乾元鄉水自古長流入上饒江前志

古良溪 在縣南五十五里永樂鄉源出銅與丁溪合入上饒江前志

北溪 在縣南六十里乾元鄉宋理學陳才卿故廬有竹林居址尚存增

以上南岸支流小水

生生泉 明嘉靖丙午刑部郎中翁大立所鑿舊在行臺廳事左今以其地創建試院并在頭門內西前志

郎中翁大立自記嘉靖丙午予以刑部郎中審錄江西逾年五月至廣信即御史臺居之將復命從吏皆病疫臺中有怪物狀類狗而大每夜分即來來即食厨具去繚垣無竇扁戶皆弗啟也時信城中亦病疫民間鳴金伐鼓驅疫鬼聲徹昏曉從吏聞之又言有怪物事皆恐恐畏死泣且告予予曰妖不勝德果怪物也即殺之耳予乃肅衣冠藏燈密室待之夜分果來命隸人遮擊擊數百乃死疫者疑稍解然召醫診視終弗愈忽夢神人語曰君從者病惟天一生能治之明日且至明日爲六月朔也予蚤起戒門者曰有稱天一生者至毋留門日晡無報至者予循除散步且疑且思忽堂之西偏有地津津然以物發視至尺許清泉湧出竇從乾方承若瀆沫狀飲之寒且甘予喜曰天一生水神去告我哉遂命疫者人飲數瓢飲

地理 山水

卽愈旣而城中疫者羣飲之無不愈者予乃命工採石甃爲井或請名之予曰生者天地之大德仁者人心之生理猶夫泉也生生不息故地道以泉生萬物聖人以仁生萬民予祇奉德意爲繫者求生得茹冤者疏請白之法可殺情可原者輕之得不死其他末減有差皆聖人生之也泉之應殆以是焉顧予淺陋闕於情欸雖蚤夜滌濯以究所謂生生之者猶恐深文巧致未易繹思使聖人之澤溼於弗鬯泉雖清流或壅矣名之曰生生泉因以自鏡焉越十年丁巳予以江西按察使至明年正月擢廣東右布政使兩過之酌而酌曰泉不負予予胡可負泉也遂銘之銘曰井試收勿使覆我不潔泉請竭

聖侯先記生生泉在廣信行察院廳事西發之自餘幾見海翁君始始君以刑部郎錄囚江右五月駐廣人疫院中夜數有怪竊食夕覆燈默坐命惡擊步十數百乃死衆疑稍釋而病未解夜夢神爲語曰且天一生至病可瘳也日晡徘徊階除見地上有泉消從西北來竅如維續停如傾注味甘而寒且

例君乃悟曰是故所謂天一生也命疫者羣取飲之疫盡愈於是坎以爲井而石以爲甃且曰吾奉命爲囚求生懼無以廣德意布惠澤然聖天子好生之仁天實鑒之意者其醴泉之神貺與乃名之曰生生泉聞者曰蘇子不云乎水行地中隨地得泉泉常也得之夢可怪也宜名曰夢泉或曰不然君內明而外辨潔守而達節於刑也輕重以情出入無少枉泉譬則河之潤東海之雨蓋其應也予好品泉每遊名山輒取泉徧飲之其甘寒而冽者必乳泉也於井則否故品下今井泉而乳且愈病獨夢足怪耶人心不息天地同流一念之生感以類應故曰思之不得鬼神將通之夫生物者天地之心也吾得其心而致誠焉沉而爲淵焦而爲火潛天潛地無幽弗入奚獨泉哉是故據其跡者執之以彼我握其機者約之以聚散故謂泉自生生亦可謂泉有由以生生亦可謂因吾之生生亦可謂卽吾之生生亦可然特不知其至期而與夢會者誰爲之也不見幻師於水火耶胡然而能滯胡然而能焚夫斯泉固取水之類而莫或知也

是故物能為怪怪有所不勝心能為感感有所不齊
怪有由滅昧者不能原其感感有必應昧者不知以
為怪非不感於怪而能通於感者其孰知泉之生生
哉後十年君來江右為按察使未幾擢廣東右布政
使每經廣信必飲泉而後行復紀其事因憲副立山
袁君不子曰願記之會郡守鑑堂周君使來日碑具
矣乃書各問
者而為之記

牧泉

在府學
門東

考篆銘高不谷卑不溢

井其井勿用幕前志

南池

在府治內相傳故州
之泮池今志

官井

在城隅闕闕坊又名義井宋嘉泰間義門鄭安壽
修尋地明萬歷癸巳鄭柯翁示

夢泉

在孔雀
院前志

化雨泉

在信江書院內井深味甘而冽
盛之不竭善釀者咸取汲焉府志

新月池

在信江書院後鑿石為池規如
新月檻泉側出大旱不涸府志

洗墨池

在六十二都前
志遺載今補入

王翰有詩云靜觀魚躍波
文敏彷彿松烟在硯池

陸羽泉

在城北茶山寺唐陸羽嘗寓其地即山種茶品為
第四其水似井而傍山色白味甘是為乳泉以土

色赤又名
燕支井

湘潭唐世徵詩生為茶經累季疵禿矜揚杓

亦何辭豈知北郭空山裏占得寒泉雪一池

按歐陽永叔記云羽所說二十水廬山康王谷水第

一無錫惠山石泉第二蘄州蘭谷谿石下水第三峽

州扇子峽蝦蟆口水第四又劉伯芻載羽為李季卿

論水次第有二十種伯芻以楊子江為第一惠山石

泉為第二虎邱石井為第三丹陽寺井為第四皆不及信州膳脂井列之第四好事者所附會耶考茶經祇載山水上江水中井水下其山水揀乳泉石池漫流者上其江水取去人遠者井取多汲者初不嘗次第而此水似井而傍山色白而味甘殆乳井泉乎當仍舊志曰陸羽泉不當以第四之名溷之屈之俾博雅者

聖井

在永樂鄉湖古山方廣一池中有井深不可測宋大觀間歲早江元帥道成於此祈禱獲鱗介之屬輒雨

九井

在高泉院四時不竭今皆廢止存一井在德前寺僧架轆轤其上取以供茗府志

銅塘井

在永樂鄉山勢幽邃欲雨則雲氣蒸騰旱禱輒應井有九登其三則險阻其六不能復深人矣前志

白龍井

在石橋鄉有白龍太子廟前志

嘉源井

在永樂鄉前志

泉洋

在縣南六十里永樂鄉平地湧泉若湖漑田數百餘畝增

以上水之出於池井者

鐘石灘

在縣西八十里灘畔有巨石如鐘前志

老虎灘

在縣西三十里開化鄉灘勢險惡故名前志按前志載此灘在縣西三十里而府志則云十里但查饒境無此灘名則此灘疑是鉛境葉青洲下者與鐘石灘俱為鉛山境而饒邑誤載之姑附識於此以俟

焉 考核

按前志山川錯載查考維艱且五級峯一滴泉係南巖八景南巖既標載則二景自應附本山彙紀不得

另條平列今一一釐正山挨都彙次水分南北中三條庶幾便於觀覽云

物產

金 乾元鄉有包家場宋代建炎三年竭罷採前志

銀 永樂鄉有桐木坑宋紹興八年竭罷採前志

鐵 永樂鄉鐵山舊嘗冶鐵尋竭尋廢前志

水晶 靈山鄉稱產水晶其實白雲尖下石色名也明永樂間差官採取不得天順間中官葉達奏罷宋時地方官符貢水晶十事

非土產也前志

軍穀 有救公饑三朝齊六十日占九十日占等名又有冬早穀粒似皂色而芒長通志

白穀 有早白沙早紅根早等名又有紅穀曰夏挑紅北風占等名通志

糯穀 有赤糯紅糯白糯重陽糯糊椒糯竹亞糯等名通志

石耳 各靈芝靈山石壁有之前志

蓮子 田膏肥美者可種夏月始華五月結實者曰衢薄仔內結實者曰伏蓮立秋後實者曰秋蓮在地皆種之

惟皮白者差佳

蓮藕 西濠者佳

茶 四鄉售者多園茶前志

紙 以竹筍外浸搗碎為之西南北鄉皆有其各色不一前志

蜜 蜂釀成者清者為蜜其渣為蠟前志

葛粉

搗葛根為之可
以解醒前志

蕨粉

蕨根有白粉搗而淘之可
作羹饑年賴以全活前志

相油

一名鴟曰收子取油甚為民利子外白穰壓油造燭
名曰玉燭子中黑仁壓油燃燈名曰水油邑中無不
植者前志

苧麻

木棉

抽緒紡之以作布邑人多植之又
一種紫花其布製衣頗樸雅前志

藕粉

以藕搗浸澄粉食之益年西
濠出者佳今亦不可多得

砒石

本草云惟信州者佳故一
名信石鍊者名砒霜前志

岡桐

實大而圓取子作
油可入漆前志

綠青

本草云即信
州石碌前志

楮

俗呼穀皮樹
可作紙前志

空青

本草云陰石也產上縣似鐘乳者佳真宗年間
詔取空青信民穴山而取極難得鄉人苦之

明鄭文恪五章并引云信風也信何以風以上於饒
名饒而實瘠也陶穀清異錄臨川上饒之民以新智
珣醒骨紗純絲蕉骨相兼撚織夏月衣之輕涼適體
號太清篋又為四襖肉衫子呼小太青又上饒葛溪
鐵精而工細剪刀交股屈環遇物如風刈上有鑿字
曰二儀刀今皆無之廬陵周密癸辛雜志明堂所用
鬱鬯三十斤取之信州味毒徒為文具在宋如此今
貢亦無民間不聞採種本草空青出饒信治瞳神效
然越雋蔚蘭皆有信市者多贗物豈古有今無土亦
遷德乎唐人謂饒土風貧薄信哉且信有封禁山原
為盜藪幸列朝閉之而攤其賦於民萬歷間有倡開
採之說者信釀金為木價幸神宗免開此世世安也

然實山諸侯國亦衢處諸侯也負饒名而有瘠實所
自來矣因成互章非敢擬曹檜也用告司牧一曰小
太青其輕如霧今手多拙織止厲布傷彼不絲裁我
襦袴裁我襦袴兮耐以掩露二曰二儀刀如風斯刈
今煨不工犀弗剪菜傷彼不精鑄我犁耒鑄我犁耒
兮耐以塞喙三曰惟鬱鬱可以合酒今土未種何以
充直傷彼不材種我松柳種我松柳兮耐以薪餽四
曰惟空青可以愈盲今醫多贗何以奏功傷彼不情
採我蕨蒿採我蕨蒿兮耐以度荒五曰寧賦有隴山
之士毋俾藪奸寧木有價城之民毋俾寇殘願世世
開承不我刊承不
我刊分雖瘠且安

前志撫載甚夥實則穀米紙油而外蓮藕葛粉僅足
供家常而已金銀絕無水晶以虛名賈實者亦宋時俱
告罷鐵山曾治鐵今已不復產廢場空存而已此年

山鄉廣植桐斲全山耕爲隴畝利亦僅有之然而山
土疏鬆遇雨則沙石崩潰填塞谿壑殆遍豬水淺故
旱魃易於告病且山盡不毛驅虫豸而注諸田螟螣
害稼者十年常六七焉細民見淺尙何如補救哉

風俗

地多深山大谷人有巢穴其間者數輕生好鬪脫遇儉歲
不無猩鼯嘯竹之警其地上于饒其俗羨于廣

王雷修
城記

信之爲郡山奇而廉故人得之矜名而喜節其失也隘水
清而駛故人得之善慧而好修其失也激原隰平行而山

澤楮葬陶冶之利耶足謀生故民得之惟土愛物而心臧其失也嗇是七邑之同也類分之則饒玉永爲上三邑習相近也而饒以質勝

明嘉靖舊志論

其君子則亢言而厲行其小人則少械而寡求其婦女則

無故不出戶庭不事耕獲不給薪水不行鬻於市

同上

民安土重業俗儉嗇矜謹節義

鄧元錫方域志

吉凶之禮今古兼行宋明以前冠禮猶備三加生員之冠多于學官行之後寢廢婚不親迎喪事尙佛老祭以俗節尤重墓祭士大夫家始用金鼓同閭好事者慕之

以道嘗書信之土風有曰無燭盡燒烏柏子有錢不買茶藻田花磚堂上看禾稼石墀墳邊聽管絃蓋異之也今無

是矣

府志論

地僻山深古上饒土風貧薄道程遙

白居易詩

饒邑附郡郭密邇治化由宋迄明人文稱盛然俗貧而嗇無物產之饒雖仕宦亦貧民自樹藝五穀外恒無他業村野足飽父母妻子便稱安戶舊多訟今半減于曩時信巫今不絕於報賽士不好遊矜名而厲節民不好流物愛而心臧生理具皆知訓其子孫薪水空斷不役其婦女猶佳

俗也

舊志

隋書地理志云喪紀婚姻率漸於禮府志論又云喪事尚佛老而禮則鮮有深求者舊志言婦女無故不出戶庭美俗也茲則燒香酬愿男婦接踵恬不為怪美安在哉吾願有志之士秉禮之儒一振其氣一挽其風庶幾盛於昔而

進於古 前志原跋

附王可軌乘德篇一則留餘翁葉南巖仕至郡守明正德戊辰有盜塋其先塚家果被小災已覺之棺有碎畏罷骨時翁尹浦去家僅二日家人以聞且欲棄骨於水火翁傷悼不合棄骨曰此其子孫貪富所為非逆者罪瘞之可也且禍福有定數豈人所能為乎已而家竟無恙身歷金緋子少巖歷南少司人始知盜塋者為族惡少已犯盜繫獄疫死家翁之不仇仇者之親正以命定定情於內觀仁此天之所以反中貪者也 按盜塋皆有之而信郡為尤盜者可誅王者或不

